



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 8

Jaishankar-i UK semdanga
Foreign Minister, Cleverly ajurutsü

Ghana nunger striker Dwamena
ground nung laoba sülen asü

VOL. XXI NO. 36 (ADOK 36) DIMAPUR TENTONÜ (MONDAY) YIMPOKSÜI (NOVEMBER) 13, 2023 ₹ 5.00

UNC-i Meitei aser Kuki nunger dang rara anentsü ayongzüker

Imphal, November 12, 2023 (Agencies): Manipur nung Meitei aser Kuki nunger tsungda yimjung olemtep junga meliteti aruba mapang United Naga Council, (UNC)-i kin anaprong dang tekaratiba nung tangatettep kati arutsü mepishia metetdaksüogo.

Meitei aser Kuki nunger tsungda angatetteper "joint declaration" ka agütsü junger ta UNC Peace Committee-i ashi.

Meitei mesüra Kuki-Zo nunger kari molungsoa ceasefire sangdongtsüla ta parnok ashi.

"Telok ana rongnung kati

yimjung osang sangoktsüra tanga telokia iba sülen anidaksü kechiyong ibaji tasütait inyakyim ka asütsü" ta UNC Peace Committee-isa ashi.

UNC-i Meitei aser Kuki-Zo nunger den mapang balala nung ajurutepogo saka parnok senden nung jembiba osang yimjak nung mashir.

Taküm September ita Naga peace committee-i Centre aser state sorkartem dang ozüing timi benshitsü atema tetsübu aser shinga tejak mereprangi inyaksü ayongzükerogo.

Chiuluan yimtsüng nung Amur falcons 1.41 lakh lir

Imphal, November 12, 2023 (Agencies): Tamenglong kübok Chiuluan yimtsüng tang mezüing atema Amur falcons census agiogo aser tang ozü 1,41,274 anenzüka lir ta bushitetogo.

Amur Falcon indang survey ya Wildlife Explorers Manipur (WEM) züingsem 11-i inyak aser parnok drones, Global Positioning System (GPS) devices aser telephoto cameras amshia census mapa inyak.

"Amul falcons roosting site ya Barak ayongküim anasa aou rong ka nung lir" ta WEM President Khoyumthem Brajesh Kumar-i ashi.

"Iba census nukjidong ya Chiuluan yimtsüng nung Amur falcons anenzüka aliba metettsü atema lir. Iba ya pilot project ka lir aser tarutsü nung district nung ozü anenzükba osang metettsü atema inyaksü" ta Kumar-isa ashi.

Zeliangrong-Naga nunger teimba ser aliba district nung

Amu Falcon anenzükba tesem 6-Chiuluan, Bhalok, Matung, Puching, Punglam aser Duigailong nungi Chiuluan yimtsüng nung census mapa inyak.

Iba mapa nung Rainforest Club Tamenglong (RCT) volunteers aser Divisional Forest Office staff-ia yaritep.

Amur falcons ya South Eastern Siberia aser Northern China nungi Tamenglong aser anameta aliba Nagaland nung arua anenzükber.

Amu Falcon ya ita ka shi anenzükba sülen Africa kübok Southern aser Eastern regions tsütsü apusoa aoer.

Sangküma tanga roosting sites nung maneni survey agütsü ta Tamenglong nung Divisional forest officer Amandeep-i ashi.

Wildlife Institute of India (WII)-i sangküim Amur falcons migratory pattern tali metettsü atema ozü ana tag asütsü sentong lir.

Mizoram polling ketdangsür ka mapa nungi anentsü

Aizawl, November 12, 2023 (Agencies): Mizoram kübok Muallungthu polling station nung polling ketdangsür kati official duty shitak meinyakba aser kulikakettem tim mesüi amshiba atema mapa nungi anentsüogo.

Honibarnü state agriculture department secretary-i sangdong ka nung deputy director Lalremmawia Colney mapa nungi anentsüba metetdaksü.

Aizawl South-III assembly constituency kübok Muallungthu polling station nung Colney ya presiding officer ama inyaka liasü.

Election Commission-i tuyuba ama Lalremmawia Colney-i Muallungthu polling station nung mapa shitak meinyakba aser kulikakettem tim mesüi amshiba atema departmental inquiry ka agi.

Iba sülen Colney mapa nungi anentsüogo aser bangdakpur dang nungi temelaba magüi Aizawl adena maotsü tetuyuba

agütsüogo.

Züingsem 40 agi akümba Mizoram assembly indang election November 7 nü agia liasü. Mizoram kübok polling stations 1,276 nung polling agi.

November 7 matongdang Muallungthu polling station nung polling ketdangsürtemi 'mock poll' magiba ajanga November 10 nü repolling agia liasü.

Mizoram nung arishi küm 80 temapur aser Persons with Disabilities (PwD) 15,061-i home voting aser postal ballots ajanga vote enokja liasü.

Mizoram assembly election nung tetsür 18 dena candidate ajak agi 174 liasü.

Mizo National Front (MNF), opposition Zoram People's Movement (ZPM) aser Congress-i menden 40 prong nung toktep. Külen BJP-i menden 23 aser Aam Aami Party (AAP)-i menden 4 nung toktep. Maneni, independent candidates 27 liasü.

PM Modi-i Army jawan tem den Diwali among



New Delhi, November 12, 2023 (Agencies): Prime Minister Narendra Modi-i Himachal Pradesh nung mapa lemzüka aliba Lepcha sepaitem den Diwali mongogo.

"Indian Army-i arrtsülen asen Himalayas ama akangkanga noktakba tashi India lendong nungi kümzüka lir" ta PM Modi-i ashi.

"Alima tesem balala nung raratem liala asen Army-i arrtsü kanga junga anükba atema tenüingsang agütsür. Tanü alima tensa repranga India dak teimla kanga lir. Iba ama tensa ka nung India arrtsü akangkanga alitsü nungdaker. Asen linük nung yimjung tensa lir aser iba nung

nenok (Army) shilem tulu lir" ta paisa metetdaksü.

Indian Army aser security forces ajanga linük yangerba mapa nung teti shilem tajung agia arur ta PM Modi-isa ashi.

Pai tesüiba küm 30 aser 35 tashi Army jawans den Diwali mongyonga arur ta Modi-isa shisem.

Pai Gujarat chief minister mesüra prime minister makümdang nungi Army jawan tem den Diwali monga arur ta paisa metetdaksü.

Sepaitemi pei kibongtem den pilar Diwali amongba atema tenüingsang agütsür. Diwali ya kibong den amonger saka tanü nenok arrtsü nung mapa

lemzüka lir. Iba ajanga nenoki kanga dang nendaka mapa inyakba sayur" ta PM Modi-isa ashi.

"Kü atemabo security forces lemzüka aliba tesem ajak ya tekülem ki ka ama lir" ta paisa ashi.

"India ya defence sector nung 'global player' ka ama kümdar aser asen linük defence dang masü saka asenok medemer linüktem indang defence asoshi inyaksüla. 2016 Diwali nungi taküm tashi nung India defence exports tiben agi teimba kümogo aser tang domestic defence production Rs 1 lakh crore kümogo" ta PM Modi-isa ashi.

DAYO-i Detox and Rehabilitation camp takok ngua agiogo

Dimapur, November 12, 2023 (TYO): Dimapur Ao Youth Organization (DAYO)-i achayanga anogo 10 tashi Detox and Rehabilitation camp ka kanga takok ngua agiogo.

Iba sentong nung Commandant, Assam Rifles Training Centre and School, 3rd mile Chumoukedima-i teyari agüja nungit aser ARTC nung agi.

November 3 nungi 12 tashi anogo 10 Comprehensive Addiction Recovery programme nung yi jemer nisung 4 aser drugs achir 4 aden.

Iba sentong nung doctor aser nurse dena counsellor temi yaritep aser parnok kar tanga rehabilitation centre-i aotsü tuyu aser kar tanüla tsütsü teyari nungdakba lemsatop.

Deobarnü Closing function cum honourable discharge programme ka ayonga agidang Child Welfare Committee, Dimapur Chairperson Moamenla Yaden-i tetushi süa jaoker ka ama shilem agia liasü.

Moamenla-i Detox and

Rehabilitation camp nung adenertem ayongzüka jembidang Yisu Khrista tsüingsü sülen anidaksü ashi.

Yisu tzüsenba sülen mojing ajanga tatidang aika ajuru saka pai item ajakji ajangtet. Anungji iba sentong nung takok ngua adenba sülen tatidang balala ajuruba mokokteti akhi yimya benshia aoba nungi kümdanga alitsü atema Moamenla-i ashi.

Laisa tsüraburtem dang tanurtem timi anepalutsü aser parnok mozü achiba mesüra yi ajemba tera metettsü merangtsü ayongzüker.

Tsüraburtemi tanurtem den mapa endoktsüla, ochishia sensaksemsüla aser chinurtem senzüka meyutsütsüla ta Moamenla-isa ashi.

No. 2 Training Battalion, ARTC & School Commanding Office Colonel Tsuknungwati Jamir-ia Detox and Rehabilitation camp nung adenertem dang ARTC gate adena aoba sülen chichiba tayongzükbatem ajurutsü ta ashi.

Paisa loktiliba ajangzüksü

asoshi tarutsü anogotem nunga akokba tashi yariteptsü nangzüker.

Nagaland nung yi jemer aser mozü achir kanga bulua adoka timtemba agi DAYO-i iba sentong ayongzüksü mulungtet, ta Camp Coordinator I Abenjang-i ashi.

Nagaland nung Rehabilitation nung nisung masemer aser nisung karbo rehab nung amongtsü atema ita aika atatsüsa akümer. Anungji lokti balalai aser talisa arogotemi Social Concern department lapoka lokti asoshi mapa balala inyaksüla ta Abenjang-isa ayongzüker.

Iba camp nung adentsü ta mezüingbo nisung 25 nungi 30 shi kati tenüing agüja liasü saka parnok 9 dang aden, ta Detox and Rehabilitation camp convenor Imsentemjen Jamir-i ashi.

Loktiliba nung kanga nungdaker ta ajiteta DAYO-i iba camp ayongzüka agiogo saka iba ama sentong ayongzüka agiba nung senotsü kanga nungdaker. Anungji sorkar mesüra arogotemi acha-ayanga agi nung kanga ajungtsü ta Imsentemjen-isa ashi.

National Cadet Corps car rally tenzükogo



Dimapur, Yimpoksüi/Nov. 12 (TYO): National Cadet Corps (NCC), North Eastern Region (NER) ajanga ayongzükba Nagaland Leg car rally sentong November 12, 2023 nü Rangapahar Military Station nung Lt Gen HS Sahi, AVSM, YSM, SM, General Officer Commanding 3 Corps ajanga tenzükja liasü.

Taküm National Cadet Corps küm 75 ajungba sentong nung shilem ka ama iba rally ya agir. Addl. Director General (ADG), Maj Gen Gagan Deep-i aniba car rally ya mezüing Shillong nung November 6, 2023 nü tenzük aser November 26, 2023 nü Guwahati nung tembangtsü. Iba mapang parnoki Northeast nung state trok awajema kilometre 3500 jajatsü.

NER Directorate nungi tetsür cadets 13 aser tebur 13 den parnok indang instructor tem iba car rally nung shilem agir.

Iba rally metenzüktsüsa cadets tem den jembidang linük yangerba nung NCC ajanga shilem agiba asoshi Corps Commander-i tenüngsang agüja liasü.

Paisa iba car rally nung shilem agiba cadets tem den sensaksema linük yangerba nung lanurtemi tongti shilem agitsüba indang rasaa ashi.

Sepai ama bilemtsü, lenir aser saisaponger ka ama aser lanurtem molungjang nung linük meimba lidaktsütsü nükjidong nung iba rally ya ayongzük, ta Maj Gen Gagan Deep, ADG, NCC Directorate NER ajanga ashi.

Rangapahar nung aliba 3 Corps Headquarters nungi flag off sütsüba rally ya Eastern Christian College, Dimapur nung khen anentsü aser yangji ADG, NCC Dte NER Maj Gen Gagan Deep ajanga cadets 450 aser Dimapur nungi ANOs 18 den sensaksemtsü.

General Officer ajanga Eastern Christian College nung amenoka aliba 1 Nagaland Air Squadron NCC indang Flying simulator aircraft semzüktsü.

1 NL Air Wing NCC nung cadets temi shidakba tayimtsü anishi metenzükdang iba flying simulator yagi tayimtsü yimya balala angazüktsü, ta General Officer-i ashi.

Iba rally ya Deobarnü sa Kohima tonga Maj Gen Vikas Lakhera, SM, IG Assam Rifles (North) ajanga agizüka liasü.

Tanü Kohima nung Routine Immunization indang State Task Force senden amentsü

Dimapur, Yimpoksüi/Nov. 12 (TYO): Routine Immunization, Intensified Mission Indradhanush (IMI 5.0), aser Measles Rubella Elimination repringshimtsü asoshi State Task Force senden ka

November 13, 2023 nü Directorate of Health & Family Welfare indang IDSP Hall, Kohima nung nikongdang 2:00 ako nungi amentsü.

Iba tongtipang senden nung

ketdangsür ajak medema arua adentsü jaoker, kong health tsütsü tongtipang sentong mapa kuma inyakba nung terenlok asadanga tasa yanglutsü lir, ta sangdong ka ajanga ashi.

Kohima nung anogo ter Screen Acting Training temogo



Directorate of IPR, Kohima nung anogo ter Screen Acting Training sentong November 10, 2023 nü tema liasü. Iba sentong ya Film and Television Institute of India (FTII) aser Department of Information and Public Relations (DIPR) lungjemer ayongzükba liasü.

Dimapur, Yimpoksüi/Nov. 12 (TYO): Film and Television Institute of India (FTII) aser Department of Information and Public Relations (DIPR) lungjemer Directorate of IPR, Kohima nung anogo ter asoshi Screen Acting Training ayongzükba November 10, 2023 nü tema liasü.

Joint Director, IPR, Asangla Imsong ajanga iba sentong nung jembidang, shilem agirtemi training tepiyong bendanga agütsür training agiba atema tenüngsang agüja liasü.

Tarutsü anogotem nunga lungjemer inyaktsü teimla aliba lai lemsatop aser FTII ajanga lungjemer inyakba atema pelaba lemsatopa liasü.

Lai iba training nung shisalen sayur Anita Salim nema tenüngsang agüja liasü.

Asangla Imsong-isa Ministry of Information and Broadcasting, Government of India den lungjemer Hornbill Festival mapang Nagaland Film Festival ayongzüktsü aliba indanga lemsatop aser state nung film tsütsü tejangraba aliba lanurtemi industry nung shilem tajung agitetsüsa sempet lir ta ashi.

Department ajanga kanga junga anepaluba asoshi Anita Salim-i pelaba lemsatop aser training agirtem dak terenlok aliba indang lai tushia jembia liasü.

Training nung shilem agirtem

dang Course coordinator aser APRO DIPR, Wepre Kronu-ia pelaba ashi aser parnoki yimya tajung amshiba ajanga training takok ngua agiogo ta ashi.

Shisalen sayuri acting yimyatem sayuba kisüing masü saka jenjang tulu aketba lessons sayuogo, ta Kronu-i ashi.

Anita Salim tajangshiba tajung bener Nagaland yutsür aotsü südi ta amanger, ta pai ashi.

Iba sentong nung training agirtemia parnoki ajangshibatem lemsatop aser iba training ajanga parnok indang acting skills tajungba akumba kuli agütsü aser tarutsü anogotem nunga iba ama sentong ayongzüktsü yongya atar ta shia liasü.

Phek nung state BJP tir-i party ketdangsür ajuru

Dimapur, Yimpoksüi/Nov. 12 (TYO): Nagaland state BJP tir Benjamin Yepthomi aser ketdangpur temi Phek district semdangba November 8, 2023 nikongdang Ruzazho yimtsüing nung agizüka liasü.

Iba sülen Netaji Subhash Chandra Bose Memorial Hall nung senden ka amen, kong Bose den par INA sepaitem den anogo toku mungzük südi ta amanger.

Iba tesem nung Nagaland

state BJP tiri Phek District Officials, 5 Mandal Presidents, Morchas aser Booth Level Committee members tem den senden balala mena liasü.

Nagaland state BJP tir tasenba, Benjamin Yepthomi ya state kübok district ajunga sema jajatsüba sentong lir aser tang tashinung pai Mon, Aboi, Longleng, Tuensang, Noklak, Shamator, Kipheri, Pungro, Meluri, Phek aser Zunheboto district tem semdangogo.

Mokokchung nung temesepba mozü amshiba indang seminar agütsü

Dimapur, Yimpoksüi/Nov. 12 (TYO): Temesepba mozü amshiba dak sendakba nung seminar ka November 9, 2023 nü Mokokchung nung Department of Social Welfare, Government of Nagaland ajanga ayongzükba liasü.

Iba sentong nung Mokokchung district nung aliba Child Care Institutions (CCI), District Child Protection Unit (DCPU), Child Welfare Committee, JJB aser SJPU densema stakeholders tem dena liasü.

Shisalen sayur, Dr. T Amongla, Principal, People's College Mokokchung ajanga temesepba mozü amshirtem jangjateta parnok yaritsü

lenmang aser yimya balala indang jembia liasü.

District Child Protection Officer, Samuel Kapu-i tarur pela agizükba o jembidang pei alidak temesepba mozü achi-ajemba azüoktsü asoshi ajak lungjemer inyaktsü tongtipang lir ta ashi.

Maneni Additional Deputy Commissioner (ADC), Chumlammo Hamtsoe-i o tatsüka jembidang Mokokchung district nung temesepba mozü anema nokdaksü aser pei aliba tesem tajungba kumdaktsütsü arok khuret lir, ta ashi.

Iba seminar nung district nung temesepba mozü anema lungjemer nokdaksü asoshi shisatsü lemsatopa liasü.

13 Assam Rifles-i Kohima nung Anti-Drug Campaign agi

Dimapur, Yimpoksüi/Nov. 12 (TYO): Temesepba mozü amshiba azüoktsü nükjidong nung 13 Assam Rifles ajanga November 10, 2023 nü Modern Higher Secondary School, Kohima nung Anti-Drug Campaign ayongzükba liasü.

Iba sentong nung 5 Sector Assam Rifles indang Commander, Herjinder Singh-i temesepba mozü amshiba ajanga temang aser loktiliba nung timtem balala ajuruba indang jembia liasü.

Iba tebilemtsü koktetsü asoshi ajak lungjemer inyaktsü pai ajungshi aser awareness agüja asangsang nung takok angutsü asoshi inyaktsü nüngdaker, ta ashi.

Temesepba mozü amshiba dak sendakba tebilemtsü koktetsü asoshi nüburtemi tongti shilem agitetsü, ta pai

ashi.

Recovery Wellness Society, Guwahati nungi tongti o jembir Anupam Rohit-i temesepba mozü amshiba nungi pa jenboba indang lemsatop aser temesepba mozü ajanga pei takum aser kibong nung timtem ajurubatem shia liasü.

Pai kaketshirtem dang temesepba mozü nungi pila alitsü aser pela aser asüngteta aliba takum lenmang nung jajatsü ayongzük.

Iba campaign nung Miss Nagaland Hikali Achumi-ia temesepba mozü nungi pila alitsüba indang yimya tongtipang kar lemsatopa liasü.

Iba sentong nung school aser college balala nungi kaketshirtem den Kripa Foundation aser Eden Garden Orphanage nungia teshimtet nisung kar dena liasü.

Anganwadi nung inyaker nem training agütsü

Dimapur, Yimpoksüi/Nov. 12 (TYO): Directorate of Social Welfare nungi ketdangsürtemi November 8, 2023 nü tesem balala semdanga Anganwadi Workers aser Helpers tem den sensaksemba den Bhumnyu yimdak Anganwadi Centres asadanga yangji ki tasenba aser tejenba repringa liasü.

Iba mapang ketdangsür temi item community centers inyakyim aser parnok tia tejanga angateta liasü.

Iba sülen November 9, 2023 nü VDB Hall, Longleng nung training mali aliba Anganwadi Workers nem induction training sentong ka ayongzükba liasü.

Iba training ya Social Welfare Department kübok Longleng aser Tamlu ICDS Project nungi ketdangsürtemi agütsü.

Anganwadi nung inuaker nem skills aser shisatsü balala agütsütsü nükjidong nung iba training ya ayongzükba liasü.



November 12, 2023 nü Himachal Pradesh kübok Lepcha nung Ato kilonser, Narendra Modi-i sepaitem den Diwali benjung amongba mapang tangokba noksa nung angur.

LAC nung India aser China Ground Commanders senden amen

New Delhi, Yimpoksüi/ November 12 (Agencies): Asükwä mongpu atongtsü mapang ana nung lia Ladakh kübok LAC (Line of Actual Control) nung India aser China ground commanders senden aiben mena asükwä mapang arrtsülen meraratsü atema jembio.

Anüdoklen Ladakh nung India aser China sepaitem tsüingda Galwan Valley nung rara adokba sülen tang agi asükwä mongpu pezübuba ajurutsü.

"LAC kübok point balala nung joko anogo ter jungnüa local commanders level nung

senden mena arudar. Asükwä mongpu mapang nung mangatettep madoktsü atema item senden nung jembio," ta Indian army temi sangdong ka nung metetdaksü.

Taruba hopta ishika ano maneni item ama senden amentsü, ta sangdong nung shia lir.

"Linük ana nungi Corps Commander-level senden nung confidence-building measures (CBMs) atema o lemtepogo.

Sepai ketdangsertemi tang arrtsülen lateta aliba ozüngtem beshitsü aser tejak chitepa ajurua rara madoktsü atema

patrolling senzütsü asoshi jelia osangtsüsang lemsteptsü atema jembio," ta kasa sangdong ajanga metetdaksü.

Yaküm September ita nung India aser China napronglai anüdoklen Ladakh kübok Gogra-Hot Springs area nung aliba Patrolling Point-15 nungi sepaitem aniteta liasü.

Tesüiba küm asem tsüingda Galwan Valley, Pangong Tso aser Gogra-Hot Springs area ama raraba tesemtem nung rara madoktsü atema bangzüng renemogo, ajisüaka Depsang Plains aser Demchok nungbo tang tashi linük anaprongla nungi sepaitem mainshi.

Israel anema renemba bangzüng pusema India-i vote agütsü

New Delhi, November 12 (Agencies): Israel-i Occupied Palestinian Territory nung inyaksangshiba anema United Nations General Assembly (UNGA) nung renemba bangzüng ka pusema India-i vote agütsüogo.

'Israeli settlements in Occupied Palestinian Territory, including East Jerusalem, and occupied Syrian Golan' ta ajaba bangzüng anema vote agütsürtem rongnung Canada, Hungary, Israel, Marshall Islands, Federated States of Micronesia, Nauru aser United States linüktem liasü.

Brihostibarnü iba bangzüng pusema vote 145 agütsü, iba bangzüng anema agütsüba vote

7 liasü aser senden nung madener linük 18 liasü.

Iba bangzüng pusema vote agütsüba linük 145 nungji India den Bangladesh, Bhutan, China, France, Japan, Malaysia, Maldives, Russia, South Africa, Sri Lanka aser UK linüktem densema lir.

Iba bangzüng kübok, East Jerusalem aser occupied Syrian Golan densema Occupied Palestinian Territory nung Israel-i inyaksangshibaji UNGA-i aitsür. Iba dak alia ali rakzükba, nüburtem nem timtem agütsüba, tashiyim amshia nüburtem ainshidaksüba aser ali atsünga agiba aitsür.

Bangzüng nungji yamai shia lir, "East Jerusalem aser

occupied Syrian Golan densema Occupied Palestinian Territory nung Israel-i inyaksangshibaji ozüng alema lir aser yimjung den rongsenketzüng aser loktliiba terenlok atema tetsükdaksü lir."

October ita tatembanglen UNGA nung Gaza Strip nung timtemertem nem teyari agütsütsü atema rara anena atatsü asoshi bangzüng ka renema vote agütsüba nungbo India-i shilem magii liasü.

'Protection of civilians and upholding legal and humanitarian obligations' ta ajaba bangzüngji pusema linük 120-i vote agütsü, iba bangzüng anema linük 14-i vote agütsü aser India densema linük 45-i vote magütsü liasü.

Jaishankar-i UK semdanga Foreign Minister, Cleverly ajurutsü

New Delhi, November 12 (Agencies): November 11 nungi November 15 tashi External Affairs Minister, S Jaishankar-i United Kingdom semdangtsü, aser iba mapang nungji pai UK Foreign Minister, James Cleverly den senden amenba den külemi tongti ketdangsertem aika ajurutsü, ta Ministry of External Affairs (MEA)-i sangdong ka ajanga metetdaksü.

India aser UK na tsüingda tesendaktep tajungba kümdar; 2021 küm linük ana tsüingda Comprehensive Strategic Partnership tenzüka liasü, ta MEA-i metetdaksü.

"2021 küm nungsa India-UK Roadmap 2030 tenzüka. Iba Roadmap (asalentong) ya linük anaprongla tajangzüng angutsü atema lir. EAM-i (UK) semdangba ajanga linük ana tsüingda tesendaktep ano tajungba akümtsü," ta MEA sangdong ajangasa metetdaksü.

India aser UK nati 'Free Trade Agreement' tezüngzüktep agitsü atema 2022 küm nung tenzüka jembia arudar aser iba tezüngzüktep atema 12buba senden taküm August ita nung

menogo. Taküm November 3 nüa Ato kilonser, Narendra Modi aser UK Ato kilonser Rishi Sunak nati phone ajanga Free Trade Agreement atema jembia liasü.

"UK aser India na tsüingda tesendaktep tajungba küma lenir anati Free Trade Agreement atema ken o jembia aruba asadangogo. Linük anaprong tajangzüng angutsüsa iba tezüngzüktep junga agitettsüji kanga tongtibang, ta tenapronglai bangjemogo," ta UK sorkari sangdong ka ajanga metetdaksü.

Modi aser Sunak natisa West Asia, talisa Israel o Hamas na tsüingda raraba atema jembia liasü. Lenir anapronglai Hamas teloki Israel amakba aitsü aser kiralongrar telok ya Palestine nungter atema lenirtem masü ta bangjema liasü.

Modi aser Sunak natisa Middle East region nung iba rara tesashiba makümtsü atema jembia.

Sunak-i, Gaza nung tai maket civilians kümzüksüji kanga tongtibang aser Gaza nung timtemertem nem teyari agütsütsüsa lenmang lapoktsütsüla, ta ashi.



November 12, 2023 nü Uttarkashi district nung Silkyara-Dandalgaon tsüingda Brahmakhal-Yamunotri national highway nung 'tunnel' ka chireper aliba noksa nung angur. Iba tunnel chirepba ajanga mapa inyaker 40 shi nembanga lir, ta ketdangsertemi metetdaksü.

Canada Ato kilonser, Justin Trudeau-i maneni India aitsüogo

New Delhi, November 12 (Agencies): Canada aser India na tsüingda tesendaktep mejungi lia Canada Ato kilonser, Justin Trudeau-i maneni India aija, India-i Canada nung ketdangser 40 anentsüba ajanga Vienna Convention alema inyakogo, ta metetdaksü.

Osangbenertem den jembidang Trudeau-i, Canada nung litsu nung Khalistani lenir aser Canada senso, Hardeep Singh Nijjar tepsetba ken o bushisüngdangba maparen nung Canada-i India den tajungtiba agi inyakner, ta ashi.

"Iba ya süoki ia agitsüsa onük ka lir, aser iba atema onoki India den tajungtiba agi inyakner. Tetenzük nungi onoki kanga tebilemtsü akaba ajanga tai tonglokja alibaji lemsatepogo. Ajisüaka onoki India sorkar aser linük kar dang iba ken o ya süoki ia agitsü aser ochi jungkai adoktsü atema lemsatepogo," ta pai metetdaksü.

"India-i Vienna Convention alema inyakba aser India nung Canada nung ketdangser 40 dak tema anentsüba agi onok

mepelar," ta Trudeau-i metetdaksü.

Trudeau-isa, "Onoki US ama tembar linüktem dang International ozüng aser democracy linük ka anema inyakba ken o ya süoki ia agitsü mepishiogo. Onoki iba ya kanga süoki ia agir. Ozüng benokba agencies aser bushisüngdangba agency temi maneni parnok mapa inyakdang onokia maneni partner linüktem den inyaktsü," ta metetdaksü.

"Canada ya teti ozüng atema nokdakba linük ka asütsü. Linük tulutemi kecha tarendak makai international ozüng alema inyakra ajak atema alima ya lendong aketba tesem ka akümtsü," ta pai ashi.

"Canada nung litsu nung Canada senso ka (Nijjar) tepsetba nung India sorkar indang agency temi shilem agia lir, ta bilemtsüsa onok ket nung kulitem lir. Aser India-i ibaji langzüa Vienna Convention nung aliba temeden agiener Canada nung ketdangsertem aika anentsüogo. Iba ya linüktem atema tebilemtsü onük ka lir," ta paisa metetdaksü.



November 12, 2023 nü Kochi nung Kerala Chief Minister, Pinarayi Vijayan aser Congress lenir Ramesh Chennithala nati journalist George Kallivayali-i (abelen nungi tanabuba) züluba kaket 'Manipur FIR' sayatsüdang tangokba noksa nung angur. Kasa noksa nung taoba mapang union minister KV Thomas, Kerala Minister P Rajeev aser Kochi Mayor, M Anil Kumar nungera angur.



TIR YIMYIM

YIMOBILEM (EDITORIAL)

DIMAPUR

TENTONÜ

YIMPOKSÜI 13, 2023

Tekülem yimya melenshitsüla

Yisu dak amangertem atema Khristan yimsü nung tajung kaji amungnü shia inti tekülem temoatsü sentep sentong agiba ya lir. Ibaibo tanüla nung dang masü saka amangba purtem shi temang dena arua adenshia Tsüngrem külemtsü longjemba tesem aser sentong ka lir. Ano, tanüla tsütsü aroka bilemdangra, amungnü khen inti temoatsü sentepi aruba ya tamangertem tanüla chiyongtsü renema anganüa agütsüdak chiyongi aruba mapang ka lir, anungji tanüla chiyongtsü lemsaba aser achiba yimyaji tekülemer shia tzüratema aser nangnanga chiajemer aotsüsa mapang - mapang shia tensa dak apet tekülem yimya melenshia tekülem mapang agi nung ajungtsü. Atangji, Baptist tangatetba nung amanger amangba purtem asoshibo amongnü temoatsü sentepji dang masü saka Bodbar aser Honibar aonunga inti sentep lir. Ano, item sentep dakji alaka tanurtem aser lanurtem asoshi mapang balala nung parnoka parnok sentep sentong agia aoer. Item sentepitem ajakji tamanger shia Tsüngremi mulungba nung taküm lia aotsü asoshi ken agi aser Lai o agi amangba pur shia tanüla taküm mesüba sentongtem lir. Akhi mapang nungi asen lima nung asenok arogo nung tenla kidang sentep sentong agibaji sentep metenzükdang nisung arusep ataa Osangtajung ken kakat nungi mesüra asentenshi mapang atenba kentem tena atatsü aser sentep metenzükdang lokti atema temetetsü aser teinyaktsü sentongtem metetdaksütsü. Iba sülen ken ka tener sentep tenzüka sarasademtsü aserbo temeja ken kari atentsüa akok, ajiserbo tenla sen sarur Tsüngrem o minute semer shi jembir ken ka tener sarasademer senshir. Aji tang tashi asenok arogo nung tenla kidang agia aruba sentep sentong inyakyim yimyatem lir. Atangji, ozüngbo masü saka asenok tekülem sentep sentongji ghonda ka dak tali magitsü meranger, anungji iba mapangji amshia sentep sentong yangludang asenok shitakba tanüla chiyongtsü chiyongtsübo mapang mangur. Iba tangatetba aser yimyaji melentsüla. Aji oda, tang amshiba yimya amai mezüng tsüngtsüng temer sentep metenzük tashi sarasadema Osangtajung ken kakat nungi ken kwi tentetdir tena atatsü aser sentep tenzüka tang amai telok külemi nokdaker ken ka atentsü aser sarasadem mapang agitsü. Ajiserbo, lokti külemi ola adoka Laishiba azüngba mapang minute 20 aser lokti külemi sarasademba mapang minute 10 agitsü. Iba sülen tenla sen sarutsü aser tenla sen saruba mapang lokti nungdak metetdaksüba mapang agitsü. Lokti nungdak metetdaksüba ya tang amai aritepa mapang kümzüksü bilema nisung ajak marusepi lia sentep metenzükdang magitsüla. Tenla sen sarur aser lokti nungdak metetdaksür sülenji dang temeja ken atentsü lira atentsü akok aser külenang lokti aroki ola adoka azüngba Lai tapu nungi tesayuri Tsüngrem o jembitsü aser tang ama teloki ken ka tener sarasademer senshitsü. Idangji, mapang minute 90 agitsüa akok. Iba amaji asenok lokti tekülem yimya melenshia agiba nükjidongji amangba pur shia nem Tsüngrem o azüngtsü, bushitsü aser angatetsü jangradaktsütsü asoshi lir. Atangji, ABAM leniba nung asenoki Laishiba dangi Meyipba omen nung sentongtem agia aruogo. Ajisüaka, asenoki Laishiba dangi Meyipba omen aser nükjidongji kija nem Laishiba ajunga züngmaa züngdaktsütsü asoshi latet amai bilema inyaker. Ibayongji, asenok tenla kidang khen khen Langzütepa azüngba Lai o dak alaka lokti külemi Laishiba azüngba aser bushiba mapang magir. Aji kanga zübazübar. Anungji, tang nungibo asenok asoshi Laishiba dangi meyipbaji kija dang masü saka inti sentep nung lokti külemi Lai azüngba, Lai bushiba aser iba Lai nung jaji tesayuri Laishiba teratet agütsüba sentong asütsüla. Aji oda, Laishiba angatetsü atema tamasa azüngtsüla saka azüngyonga mangatetsüa akok, kechiyong nisung kolok kisüng agibo Tsüngrem o angatetsü makok, anungji tesayuri Lai o teratet agüja sayutsüngitsü nungdaker. Atangji, sentep nung asenok asoshi Tsüngrem o jembibaji tajungshi mesüra tayongzükbä o jembir amai agir, saka tenla kidang Tsüngrem o jembibajibo tajungshi aser tayongzükbä o dang nungi talangba aser tarokba, kechiyong Tsüngrem o tanüla temeshi tashi aser ain nung nisungi rateta shia sayutsübjaji temela masü aser angatetsübjajisa tasakba. Ajisüaka, kodang lokti külemi ola adoka Laishiba zünger tesayuri angateta sayudir, iba sentepjibo senteper mesenshinütsü.

OLEMSABANG

TSÜNGREMER TEMEIM ASER TATASABA YA KODA TESÜNGMANGTSÜ

R. Nungshi Longkümer

Yisu Khrista tanaben arutsü indang Lai nung 2 Peter 3:9 nung yamai shia angutsü, "Kari menur amai bilemaka Kibubai Pei tenangzükbä indang memenur, saka shinga mesamadaktsüner saka ajak tekümüzkba dangi arudaktsünüa Pai nenok tsütsü talangka aremzüker." Adangji meimchirtem rongnung kümzükbapurtem Kodaki anir aotsü asoshi Khrista tanaben iba limai arutsü nangzüka ali nung iba anogo yongyaa adartem koda tepelatsü. Saka ano atasa-a alibaji koda tesüngmangtsü kechiyong aoksaka Khristaji tanu aru nungbo meimchir timbaka molumi aotsü. Süra itemji koda tesasatsü aser temeimtsüka asütsü. Oda anogo ka danga atasaa aliba mapang nungjia kar danga temullung meyipa Khrista tekümüzkba bushia arura koda temoatsü ta atasaa aliba mapang ka nung asenok lidaki, Tsüngrem tenüng sangdi.

Saka ano Lai nungsa Jungkai Adok 22:12 nung Yisui ashi "ni yakta arur nisungshia pei mapa amatu sempet agütsütsü aji Kü den lir." Iba O angashidang asenok taküm renema atatsü ya koda tongtipang, kechiyong temeimTsüngremi atasaa aliba mapang nung asen taküm merenemi lia asen takümji süa dokra molomi aotsü saka renema alirtembo koda tepelatsü asütsü. Saka asenok meimchirtem inyaker ang chiyongtsüba lima nung alie asünung asen takümji Kodaki aotsüsa renemer liaka mapa balala inyaka atatsü. Alua ayimtsü, süngdong lidong atemtsü, shishilembaba mapa tulu inyaksü, sentong yanglutsü, chirnurtem school tajüng nung züngdaktsütsü ajungshitsü, alimar maparen balala inyaksü. Saka takümji renemer kulen sentong ahakji renemra koda tepelatsü koda jangratemtsü asütsü.

Yisu yakta arur anungji chirnurtem schooli meyokti ta süra ajibo tamashi mapa asütsü. Ano Lai nungsa Lipok 1:28 Tsüngremi ashi, "Soyapokyang aser jendi renang, alimaji süngdakjang aser aji azüokang" ta shia angütsü. Akidang tsürabur mapang nung kibong ka nungi chirnur ter (10) dak temasa soa mesüa aru, aji tetsü pok nung aliba tar metoktem tashi asoba lir, aser tebu o tetsü naji aluyimer dang asünung chirnurtemji mesütsü aser azüoktsü kanga temelabo masü sür alitsü südi. Saka parnok mapabo ochi dang liasü kechiyong aluyimba mapa nung aibelentsü aika mali oda takartemi sensaker nem tsük apua chiyongdaktsür tesülen tetemlok (interest) aika ketersa meshiba agi sensakertem tesensakba akum saka takartembo tali takaba akum, saka aji kelak kepong ochi mashi mapabo masü, oda sensaker dang tetemlok keter meshia par takar akümbaji dang tamashi aser tai liasu.

Saka parnok dak tajung kaji, chirnur aika süaka meranga mesü, meranga azüok anungji parnok rongnungi Tsüngrem tenzüker tajung jendi den ano alima lenir tajung jendi adoktet. Parnok ajanga alima nüburtem kümzüka anir aru. Iba temoatsü manungji tanü asenok lia arudaki, parnok nem tenüngsang tulu agütsüdi, parnok ano aika Kodaki oor alitsü ta amanger.

Temeimbatem Tsüngremi atasaa aliba mapang ka nung asenok liba liro ken meyipba reprangshidi arungma. Asen Naga lima ya Khristan Lima kümer joko küm aika arur. Süra Khristan lima nung alir Khristantemi Khrista aru yongya renema adar asü mesüra ochi mashi mapa inyakteptsü aser aoyateptsü mapatem nung ariteper dang? Oda Yimsüsüri anir asen lima ya kong nokdaka lir ta bilemdanger aika mali kümaogo. Oda tatem anogo anasa tetsübuttsü mapang arütsü, tetezü tamajung bilemer, tamajung inyaker jendi adoktsü ta shia lir. Ibaji nai atalokdaktsüra nabo alima nung taso malang asütsü aser nai naa mazüoktet nung nür chir koda azüoktsü. Alima raksabaji ibaji lir. Yaküm 2022 yimtsüng ka nung Arogo küm tatem report agütsüba nung nisung tasoba-tasuba osang zülua angu aser tasürtemji tebur timba aser arishi küm 40-60 timba liasü. Kechiba ta asüngdang nung mekümdang aliba den achi-ajemba nung mazüoktetba agi atura mapang anjong meshi mapang süa adokba tem lir ta ashi. Koda tesasatsü tulu lir. Tsüngremer sentongbo alima nung meimchir kwika soyapokyadi item ajakji azüokteta Kodaki yoktet nungbo Kodak nung amangbapur temji tzüyim tzüküm lisem dangbo timba Hallelujah ken dena alitsü koda jangratemtsü süla. Saka nü nem, kü nem moatsüba ka danga mazüokteti molomi yokra iba molomi nungjibo tajepba aser tepu shitepba alitsü tetezü AIATAI tia nung dang alitsü.

Anungji arungma Tsüngremer tatasaba mapang nung züzüa melili saka kija takum melenshir Tsüngrem dangi meyipdi ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Vietnam nung Montagnard Arogo nungi züngsemtem chiokogo



Vietnam nung Montagnard Khristantem arem nung mimshia tekülem sentong agidang tangokba noksa nung angur.

November 12, 2023: Tawa Vietnam nung Dak Lai Region kübok Cu M'gar District nung Montagnard Protestant Arogo nungi züngsem pezü pua jail nung puokba sülen anogo pongu shi lir chiokogo, ta International Christian Concern (ICC)-i metetdaksü.

Anogo pongu jail nung puokba mapang police-i parnok dang asüngdangya aser mapa tasak inyadkaja liasü.

Montagnard ya Vietnam kübok Central Highlands nung aliba lisopurtem lir. Dak Lai

nung Montagnard kibongtem aika Protestant Khristantem lir, ajisüaka Communist linük sorkari melaba telok ka nung danga parnok züngsema mali.

Osang angazükba agi, Dak Lai nungi Khristan pezüji chiokba mapang nung police ketdangsertemi parnok dang Khristan yimsü tokjang ta ashi, ajisüaka parnoki Khristan yimsü metoktsütsü, ta shiogo.

Protestant Khristantem jagisa Vietnam Tir, Vo Van Thuong danga parnok tekülem sentong ka nung aru adentsü aser Khristan yimsü

angazüksü mepishiogo.

Linük nung Montagnards Khristantem kanga timtemer; parnok teimbakati Khristan yimsü agizüka mapang shia tekülem sentong agir.

"Lisopur tamanger pezü chiokba osang angashia ICC-i pelar aser Vietnam nung Khristantemi tasü itta pei tamang jenjang manokshiba ngua pelar. Linük nung Montagnard Khristantem sademsadema yimsü benshitetsü atema onoki maneni yaritsü," ta ICC-i metetdaksü.

Algeria nung ketdangsertemi Khristantem ano taliba reshikangshir

November 12 2023: Tang Middle East nung rara lia Algeria sorkari maneni Arogotem anema inyaker, ta International Christian Concern (ICC)-i metetdaksü.

North Africa nung aliba Algeria linük nung tang nütsüing million 42 shi lir. Sorkari House churches nung teimba agia khen

nung nisung ter dang adenshia tekülem agitsü tuyua lir.

2022 küm Algeria sorkari Tenla ki 16 shibangtsüogo. 2020 küm coronavirus wara mapang nungi tenzüka linük nung Tenla ki aika shibangtsüogo.

Taoba hopta nunga sorkar ketdangsertemi Arogo lenirtem aika pua jail nung puokogo.

Hamas aser Israel sepaitem tsüingda rara tenzüka sülen Algeria nung Khristantem ano taliba timtemer. Algeria nung Khristantemi Israel pusemer, ta tai tonglokja sorkari Khristantem anema inyaker, aser ibaji ajanga Algeria nung Islamic maitsü raksatsür, ta aitsür.

Nepal nung yimsü temeden tamajungba akümer

November 12, 2023: ICC (International Christian Concern)-i report ka ajanga Nepal nung tamangba yimsü temeden tamajungba akümba metetdaksüogo.

Nepal nung ozüing balala aser telatetbatem ajanga Khristantem densema minorities temeden mesademi akümer; Nepal nung Hindu yimsü amangertem dak alaka tanga yimsü amangertembo alitsü kanga tasak kümogo, ta ICC-i metetdaksü.

Nepal nung Khristantem aser tanga minorities bo loktiliba nung sendeoker; parnokbo linük sensotem ama mezüingshir, ta report nung shia lir.

Taküm August-September ita nunga linük tesem ajaklen pastor tem aser Arogotem anema inyaker ajanga tamangba lokti balala tsüingda tesendaktep mejungi kümogo.

Nepal nung General Code ozüing kübok tamangba yimsü meyipdaksüba nokdang aser aibelenertembo küm 6 tashi tepuokdak ayutsü aser bendanger süra linük nungi meindoktsü.

National Penal Code 2017 ajanga-a pei yimsü tangar den lemsateptsü memeler. Nepal linük temzüng nung yamai shia lir, "shingaia tanga yimsü amanger ka tanga yimsü dangi memeyipdaksütsü mesüra tanga yimsü amangertem

meinprong masütsü."

Ajisüaka Nepal nung yimsü aser lokti tentet balalai tamangba yimsü temeden atema sorkar ketdangsertem den tongtepratepa inyaker.

Taküm June ita nunga Nepal nung Khristan tentet balalai tamangba yimsü balala amangertem lokti senden ka linük yimtiba nung ayongzüka agia liasü. Khristantemi ayongzüka seminar nungji Hindu, Buddhist, Kirat aser Khristantem aden.

Iba seminar nungji linük nung tamangba yimsü balala amangertem taremzüktep nung alitsü aser yimsü temeden alitsüji kanga tongtibang, ta jembia liasü.

ANO GO ABEN TSÜNGREM DEN

Langka shilem ka tuluba

Ano Pai ashi, Ni ne tsürabur Tsüngrem, Abraham Tsüngrem, Isak Tsüngrem aser Yakob Tsüngrem. Aser Mosai pei tejak miim kechiaser pai Tsüngrem dak reprangtsü tsübu. Anitet 3:6.

Tsüngremi ne den ne jakdang aortem taküm nung kechi atalok iba den putepa ne den jembir. Kodang Tsüngremi Mosa den ajurutep pa dang tama aortem dangi balaka pa nem mapa magütsü. Tsüngremi Abraham, Isak aser Yakob den küm noklang tejakdang tenangzükbatem yanglu aser pai tang iba tenangzükbatem atalokdaksütsü asoshi Mosa amshir.

Tsüngrem shibai Mosa ani, shibai Elija ajanga inyaker, shibai Paul anishi, shibai putu ajak nung tetsür, tebur anishi, kasa Tsüngremi na Pa mapa nung tendaktsütsü ajar. Nai iba temoatsüji angateta lir ma? Na ne dang nungi tuluba nüngdak shilem ka lir!

Asenoki tang atema dang bilemer. Asenoki tanga inyaktetbaji aginer aser teti taküm tangatetbaji makar. Tsüngremi kodanga mapa inyaka maru ama asenoki inyaker. Asenoki pa dangi maodanga Pa liasü. Tsüngremi asenok ajanga inyakba mapa nungi kechi adoker aji asenokisa angutsü yimlar. Asenok alidangsa Tsüngremi iba ataloktsütsü ta asenoki yimlar. Tsüngremi asenok ajanga kechi tenzüka aji tangar ajanga atalokdaksütsü mesüra tarutsü putu nung ataloktsütsü bilembaji asenoki matatetter.

Tsüngremi küm noklang aika inyaka aruba mapa nung Pa tendaktsü ta, Mosai angateta liasü. Kodang Mosa tebu nungertem Tsüngrem den tejak o tejak na ajurutep pa kanga dang ajemalua aküm. Na Tsüngremer tatem maka nükjidong shilem ka lir ta angatetta lir ma?

Nepal nung menoknok lendong nung Tenla ki 20 shi raksa

November 12, 2023: Taoba magnitude 6.4 nung anakba lendong nung Tenla ki 20 shi raksaogo aser nisung 150 dak tema asü, ta Khristan melungtet teloktem metetdaksü.

November 3 nü menoknok ajanga Nepal yimtiba, Kathmandu nungi mile 300 shi pilar aliba Jajarkot aser West Rukum district na tamajungba kongshia liasü.

US nung amenoka aliba Khristan International mission agencies- GFA World aser Barnabas Aid-i iba menoknok nung Arogo kiojen aika raksaba osang metetdaksü.

GFA tentetsang, K.P. Yohannan-i sangdong ka ajanga, menoknok lendong nung partner Arogotem indang Tenla ki aika raksaogo; yimsüing ka nungbo Arogo ka nungi züngsem asem tashi asü, ta metetdaksü.

GFA World-isa, kümzüka maparen inyaksü aser teyari agütsütsü atema local Arogo züngsemtem den onoki tongtepratepdar; GFA-i menoknok lendong ajanga kongshia alirtem nem yirua liasü.

chiyungtsü, sü aser süki agütsütsü, ta metetdaksü.

Menoknok agi kongshiba yimtsüing aika kanga tezülen aliba ajanga gari tonga mouteter, anungji Arogo nung inyakerteri motorbikes ajanga item tesem jagi oa timtemertem yaridar.

Khristan melungtet telok Barnabas Aid-ia menoknok lendong atalokba sülen Khristantem aika timtem tensa nung aliba osang metetdaksüogo.

Barnabas Aid-i, iba lendong nung ki 18,000 dak tema raksatsüba den külemi Tenla ki 20 raksatsüogo, ta metetdaksü.

Arogo ka nung pastor, Judha'er kibong nungbo züngsem pongu tashi asü; par jala ka den semchir pezü asü, ta local Arogo osang ka ajanga metetdaksü.

Barnabas Aid nung inyaker, Mahon-i iba ama timtem mapang nung International organizations balalai teyari agütsüba atema pelaba lemsatep.

2015 küm nunga Nepal nung menoknok lendong tesashi ataloka nisung 9,000 asüba den külemi nisung 22,000 dak tema yirua liasü.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Semku

(n) yi ajepdang amshiba yong agi atakba oset ka (bamboo strainer to strain rice beer)
* Tanü asüngbo yin agi yangluba semku amshir.

Semlok

(v) atsünglok, talila arusem, bendenloksü (take shelter with others as additional members)
* Ni kinunger kidang semloka lia school azüng.

OLONG PAITEP # 6614

1		2				3	4		5
					6				
		7							
								8	
	9								
10									11
			12		13				
			14						
15						16			

TIPLIN

- 1. Nok agi shi alep - (5)
- 3. Yong-i atakba lempak - (5)
- 7. Aoksa reprang - (6)
- 8. Te ___ et - (3)
- 9. Ajurunüa ---- - (9)
- 10. Pentok lu - (3)
- 14. Lendong nungi jenbu - (6)
- 15. Temang junga aliba - (5)
- 16. Lokti menjendi - (5)

LANGTSÜNGLEN

- 1. Peria - (5)
- 2. Tai inyak - (7)
- 4. Teptsü - (4)
- 5. Kotak ----- - (6)
- 6. Asa ___ ang - (3)
- 8. Taruba küm - (7)
- 9. Tamendak - (6)
- 11. Kibong yongsük - (5)
- 12. Kümsetta ao - (4)
- 13. Mesük - (3)

OLONG PAITEP # 6613 TELANGZÜBA

TIPLIN:

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

LANGTSÜNGLEN:


- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok, 12. Amang,
- 14. Jala.

NAI-A YA METETTER MA



New York, Park Avenue nung aliba Grand Central Terminal noksa nung angur. Iba ya alima nung railway station rongnung tulutiba lir.

Noksa nung meputepi aliba 5 bushiang



Tinsukia nung AR sepaitemi NSCN (KYA) züngsem ka apu



Guwahati, November 12, 2023 (Agencies): Tinsukia kübok Borgolai tesem nung 23 Assam Rifles (AR) sepaitemi Ram Pradhan (Ram Newar) ta ser NSCN area commander ka apu.

Iba mapang Assam Rifles sepaitemi Chinese made rifle ka, SIM cards aika aser taitüsü aketba kulikaket aika ngutetogo. NSCN Commander Ram-i Ledo, Bargolai, Lekhapani, Bomgarha, Tipong Lalpahar,

Paharpur tesemtem nungi tashiyim agi sen saruba nung shilem agiogo. Assam Rifles sepaitemi Ram Pradhan ya Lekhapani police ket nung agütsüogo aser police-i pa asüngdangya südar.

CoTU-i Kangpokpi district mokdang; Lisopur 2 chioktsü akhanger

Imphal, November 12, 2023 (Agencies): Manipur kübok Kangpokpi district nung tanü agi anogo anabuba mokdangogo. Iba district nung Kuki-Zo nung teimba alir.

November 11 anepdang 6:00 ako nung mokdangba tenzüka November 13 anepdang 6:00 ako tashi alitsü. Kangpokpi jila nung nisung noklang aika adenshir NH-102 mokdang. Honibarnü district dokan, shishilembadak aser shisaliok rejutem shibanga liasü. Ajisüaka, press dena ghonda 48 emergency services aser CoTU units mokdang kübok

madener. November 5, 2023 nü Imphal West district kübok Lamsang nungi Avinash Maibam (16) aser Ningthoujam Anthony (19) na samaba sülen police-i Kangpokpi district nung alir Kuki nung ana- Lhunkhosei Chongloi (30) aser Satgohgin Hangsinh (28) na apu. Tena ya November 17, 2023 tashi police ket nung ayutsü temelaba agütsüogo.

Raimona National Park nung shidi ka tepset

Guwahati, November 12, 2023 (Agencies): Assam kübok Raimona National Park nung shikarirtemi shidi ka tepseter tepo agizüka bener ogo.

Kachugaon division nung Forest rangers aser iba temeket nung alirtemi San Pan Range nung shidi tasüji angu. Shidi tepo maliba agi

ketdangsürtemi shikarirtemi tepset asütsü akok ta temulung malemer aser parnok aputsü atema bushisüngdang ka tenzükogo.

Tripura nung Bangladeshi nung 14 den Indian touts 3 apu

Agartala, November 12, 2023 (Agencies): November 12 anepdang Tripura Police-i mita aodang Bangladeshi nung 14 apu.

Bangladeshi nung kar ozüng alema arrtsü adena India telungi aitogo ta osang angazükba sülen Tripura Police-i nisungtem apu.

Tripura police-isa Indian touts asem apu aser parnok yagi Bangladeshi nung arrtsü adena aruba nung yarittep.

South district kübok Sabroom nung police tanur pezü dena Bangladeshi nung den India nung nisung shibelener asem apu.

"Onoki tanur pezü dena Bangladeshi nung 14 puogo. Parnok international border anasa ki ka nung jenoka liasü" ta Superintendent of Police,

"Indian touts asem jagi Bangladesh nung ozüng alema arrtsü adena anir ait. Onoki parnok okadaki anir ao aser maneni bushisüngdang südar" ta Sinha-isa ashi.



Manipur nung MLA tanutsüla aser mezüngbuba tetsür MLA Kimneo Haokip Hangshing-i relief camps nung alir Internally Displaced Persons (IDPs) nem asükwa süshitem agütsüogo. MLA Kimneo-i Litan Sareikhong relief camp semdang aser blankets, mattresses & baby healthcare products agütsü.

Myanmar nung telungpurtemi fighter jet ka khazüka yok

Yangoon, Yimpoksuü/ November 12 (Agencies): Military aser telungpur telok ka tsüingda raratepba mapang Myanmar indang fighter jet ka tsükokogo, ta telok anapronglai metetdaksü, koba junta asoshi takoksa tulu ka lir.

2021 küm sorkar atsüntoka yimsü asü tenzükba sülen military aser telungpur telok balala tanen makai raratepa arudar.

Iba fighter jet ya Myanmar anütoklen Thailand den arrtsü nung Kayah State nung Honibarnü military aser Karenni Nationalities Defence Force (KNDF) na raratepba mapang tsükoka liasü.

KNDF-i ashiba agi, parnoki iba tayimtsü ya khazüka yoka liasü.

Junta otongdar Zaw Min

Tun-i state meyong MRTV dang ashiba agi, iba jet ya technical tebilemtsü kar aliba ajanga tsükok aser tayimtsü pilot tem kecha tetsükdaksü makai jentetogo aser military den tongtepratepdar.

Myanmar military tang linük kübok tesem balala nung sorkar anemba telok balala den raratepba mapang iba tayimtsü ya tsükokogo.

Lokti nung nütsüing agi ajema aliba kintem nungi telungpurtem aser junta anemba telungpurtem longjemer military den rara arudar aser security analysts temi ashiba agi, parnoki kanga dang junga sendaktepa sorkar anema inyaksangshidar.

Military-i shimba tir-i taoba hopta ashiba agi, telungpurtem kanga junga mazüoktetba ajanga Myanmar ya lemdangtsü

ana nung lir.

Linük northeast len China den arrtsü nung aliba Shan State nung military aser telungpurtem tsüingda mangatettep adoker aliba ajanga nisung 50,000 dak tema pei talidak ki toktsür jenshiaogo. Taoba ita ethnic minority telungpur telok aseme military anema apuso tenzükba sülen parnoki jila aika atsüingogo aser shishilembatsü asoshi amshiba lenmangtem nokdangogo.

China-ia, arrtsü nung aliba parnok lisopurtem kümzüka ayutsü atema military ayongzükogo aser telok ajak dang rara anentsü asoshi mepeshia metetdaksüogo.

Telungpur teloktem yagi ashiba agi, parnoki army post 100 dak tema atsüingogo.

(Maneni tapak 8 nung...)

Nawaz Sharif-i party manifesto melentsü tuyu

Lahore, Yimpoksuü/Nov. 12 (Agencies): Pakistan indang taoba ato kilonser aser PML-N lenir Nawaz Sharif ya linük nung tashi tait mitkar asoshi tenük masünger aser tai maket ta pa indang political opponents temi tenük jaloktsüba melentsü asoshi general elections atongtsü lia par party indang manifesto committee dang tuyuogo, ta Deobarnü osangtem ajanga ashi.

Arishi küm 73 tain Pakistan Muslim League-Nawaz (PML-N) lenir shiba küm pezü tashi London nung jenoka lir October 21 nü Pakistan-i meyipa shilang, pai anir February 8, 2024 nü general elections agitsü aliba nung shilem agitsü renema lir.

Pakistan Peoples Party (PPP) aser tepuokdak yua alisang taoba ato kilonser Imran

Khan-i aniba Tehreek-e-Insaf ajanga Sharif ya mitkartem asoshi tai maket ama kumja pa aija aser disqualify sütsüba ken o tem nung court nungi temeden ngur yimsü asütsü lir ta kumtsüba asoshi pa mepelar, ta PML-N nungi nisung kari ashi.

Mitkar temi aiben tashiyim amshia sorkar atsüingdokba linük, Pakistan nung otsü yanglua asemen ato kilonser inyaksang Sharif-i züingsem 40 dak tema aliba party indang manifesto committee tasenba dang iba tenüing jalokja aliba melentsüsa mera agitsü tuyu ta ashir.

February 8 nü election agitsü lia iba tenüing ya pai melentsü janrar, ta ashi. Honibarnü PML-N ajanga sub-committees 30 tenteta liasü aser parnok dang nüburtem mesüzüksü

atema manifesto tasen yanglua November 20 tashinung agütsütsü ashi.

Politics asayatsü jenjang peria mali ta Imran Khan'er party-i ashir. Aser PML-N aser PPP tsüingta meputep tali shisanger, kechiaser Nawaz-i aniba party ya tang caretaker government den miima tesendaktep lir ta aitsür.

PPP Chairman Bilawal Bhutto-Zardari-ia tawa Sharif'er telok anema jembia liasü aser Imran Khan yimsüsüba mapang yariba establishment den miima tesendaktep yanglur ta ashi.

Taoba foreign minister-i PML-N ya chuba indang party ka lir aser mitkar temi saklokba politician tem shimba yimsü anendaksütsü asoshi ano tali tim atemtsüla, ta shia liasü.

Israel-i amakdang Palestine nunger 11,100 dak tema tepsetogo

Gaza, Yimpoksuü/Nov. 12 (Agencies): Israel mitkartemi October 7 nungi tenzükka tang tashi amakba nung asür nisung 11,100 alemogo aser yangji tilatanur 8,000 dak tema lir, ta Gaza nung aliba government media office ajanga Deobarnü ashi.

"Mozüki tem nung amakba aser nisung tasüming mesüra yirur alirtem anir aruba nokdangba mechi Ministry of Health ajanga tesüiba ghonda ishika tsüingta asüba aser yiruba osang tejangja magütsüteter," ta media office ajanga sangdong ka nung ashi.

"Occupation forces (Israel) ajanga nisung 1,130 dak tema khen nung samatsü aser asürtem nisung 11,100 alemogo aser yangji tetsür-tanur 8,000 dak tema lir aser yiruba nisung 28,000 dak tema lir," ta ashi.

Gaza nung tepsetba züingshiba ya kanga agi timba alitsü südi, ta hopta tetenzüklen assistant secretary of state for Near Eastern affairs, Barbara Leaf-i House panel

dang shia liasü.

Al-Shifa Hospital nung aliba staff temi mepishiba ama Israel mitkar temi kinü tanurtem mozüki nungi anir aotsü, ta odongtar Daniel Hagari-i Deobarnü ashi.

Ajisüaka Israel nungeri injang-bomb khaloktsüba ajanga mozüki ketdangsür aser civilian tem tetsübo aser taoksa jenjang nung lir, ta Gaza Health Ministry odongtar Ashraf al-Qudra-i ashi.

Kinü tanurtem anizüker aotsü indang asüingdang dang, "Lendong maliba mozüki bushia kinü tanurtem anir aotsü asoshi onok dang osang kecha magütsü. Tang tashi parnok kumzüka alitsü aser tali masütsü asoshi sarasademer," ta al-Qudra-i ashi.

Iba mozü kidang kinü tanur 45 lir aser ana süogo ta pai ashi.

Ghonda 24 dak tema yangi bomb pokloktsüba manener, ta Al-Shifa staff temi ashi. Mozüki ketdangsür aser yangji jenoka alirtem timba ogo saka shiranger 500 lir.

Al-Shifa, al-Rantisi aser Nasser mozüki tem nungi civilian tem parnoki lapokja aliba "secure" passage ka ajanga tetsüing agi mesüra ambulance nung aotsü akok, ta Israel army temi ashir.

Israel army ketdangsür kati al-Shifa Hospital indang director den ishiben jembioago aser lenmanga sayuogo, ta mitkari ashir.

Ajisüaka al-Shifa Hospital director, Muhammad Abu Salmiya-i Honibarnü ashiba agi, al-Shifa indang mozüki nunga tenük yoker amaker aser mozüki indang compound nung nisung senzüa alirtem dak Israeli snipers temi akhar.

Gaza south tsütsüi anir aotsü ya teimla maka, kechiaser Israel nungeri civilian tem dang south tsütsüi aotsü shiaka north den kasa amaker. Gaza south tsütsü Khan Younis yimti nung Deobarnep Israel nungeri tayimtsü amshia amakdang Palestine nunger nisung 18 tepseta liasü.

MULUNGNEN O



ASO : 5-06-1926

ASÜ : 03-11-2023

Onoki kanga dang meima aliba ozu akümdong obala **Ramoktongdang** (Longmisa) akümlit toktsür aoba anogo nungi tanü tashi kija, kibong, lokti balala aser temeimertemi rongsen, nübu aser sarasadem ajanga onok mulung sünepja ozü den asükhü lemsatepba asoshi nenok ajak dang kangasa pelaba lemsateper

Onoki nenok tsüingdong tonga arua pelaba meshitetaka nenok mapa tajung ozüi kodanga mamatoktsü. Asen Teyanglur takar Tsüingremi nenok ajak moajangma ta ozü sarasadem.

Temeim Chirnur, Semchir, Anükapang aser Kinungertem

MULUNGNEN O



Kodanga amatsü makokba terajem, ochishir aser temeim agi moshia aliba obala asür **Longrisangba** (Longsa) 30th October 2023 anogo nung ajungben tasüba ajurua tejashi khuret nung alidang shirnokisa rongsen shisatsü aser nübu agi bendanga yarigo, nenok ajak dang kanga pelar. Teyanglur Tsüingremi nenok ajak maneni moajang ta ozü tamang sarasadem.

Temeim kinungtsü aser jala jabaso

Menungra Bilemteter



Asür Supongtula Jamir 13 - 11 - 2022

Nai onok yutsür kotaki orr tanü küm ka ajungdang onoki na tushir.

Na maliba onoki kanga jangja meteter. Nai mapa tajung inyakba onok molung nung teti lir. Na teti onok molungjang nung alitsü.

Temeim chirnur, anük-apang aser semchirtem

LAND FOR SALE

Behind Sovima Cricket Stadium

RATE Rs. 490/- per Sq.ft.

ANY SIZE AVAILABLE

- Price Negotiable -

CONTACT 8974020568

Goa sorkari asayartem atema mapa shilem 4 mezü mekazütsütsü

Dimapur, Yimpoksüi/ November 12 (Agencies): National Games aser Volleyball World Beach Pro Tour (BPT) takok ngua ayongzüka asayaba sülen Goa sorkari state nung saisapong ajungkettsü asoshi sentongtem aser sports university ka amenoktsüba osang metetdaksüogo.

Tawa tembangba National ngua Games nung Goa team-i gold 27, silver 27 aser bronze 38 densema medal 92 ngua top ten nung tembangba sülen Chief Minister Pramod Sawant-i, asayartem atema sorkar department ajak nung mapa shilem 4 mekazüka toktsütsü sangdongogo.

Pai ashiba agi, sorkar mapa balala nung sports reservation quota ka department ajak nung asütsü. "Taoba mapang parnok nem police aser fire services nung dang mapa agüja liasü, saka tangbo department ajak nung asayartem nem mapa shilem 4 mekazütsütsü," ta pai

shisem. Sawant-i ashiba agi, sports university ka amenokba ajanga state nung asayartem nem teyari agütsütsü aser iba ajanga human resources-a adokdaksütsü.

"Onoki private university bill agizükogo aser iba ajanga onoki Goa nung private university amenokdaksütsü meranger. Goa nung sports university ka amenokra graduation, diploma aser technical courses balala tenzüktetsü aser iba ajanga saisapong nung human resources adokdaksütsü. Sorkari sports university amenoktsü jangrartem nongita yaritsü," ta CM-i ashi.

Sawant-isa, par sorkari state nung private sports university ka amenoktsü benokba pelashishia agizüktsü.

"State nung asayartem nem teyari agütsütsü aser parnok international jenjang nung tokteptsü. National games atema yangluba infrastructure

tem ya asayartemi amshitsü," ta pai ashi.

Goa nung football asaya kanga nungtugu lir, koba Portuguese nungertemi asaya aser 1923 küm India nung mezüngbuba international asaya Britain aser Portugal na asaya koba Goa-i host süa liasü.

Kasa mapang nung India nung football asaya nung nungtugu asayar Padma Shri Brahmanand Sankhwalkar aser Arjuna awardee Bruno Coutinho nati national aser international jenjang nung asaya state nem konang tetushi bener arutsüogo.

Sawant-isa, spiritual aser medical tourism den Goa ya tarutsü nung sports tourism atema kanga nungtugu akümtsü, ta ashi.

October ita Goa nung FIVB den longjemer Volleyball World-i ayongzüka Volleyball World Beach Pro Tour Goa Challenge 2023 asayaogo.

Ghana nunger striker Dwamena ground nung laoba sülen asü



Yimpoksüi/November 12, 2023 (Agencies): Arishi küm 28 tain Ghana nunger striker Raphael Dwamena Albania nung league asaya ka asayaba mapang ground nung laoa süatok.

Dwamena ya Honibarnü Egnatia nungi Partizani den asaya liasü. "Specialist doctor temi mapang shitak nung pa temang anepaluaka tia maka pa süatok," ta Albanian Football Federation (AFL)-i ashi.

Dwamena ya iba season nung Albanian league nung goal timtiba idaktsüba asayar liasü. Pai tang tashi nung goal trok idaktsür liasü. Pa linük tenüng nungia tekuben asayaogo aser iba mapang goal ana idaktsür liasü.

Honibarnü asaya masayatsü telemetba agi aser federation-i, Albania nung iba hopta asayatsü aliba asayatem ajak thinentüsügo.

"AFL-i, Dwamena'er kinunger aser Egnatia club den asükhü lemsateper. Iba takoksa tulu ajanga Albanian football community ajunga aoksadaktsüogo," ta federation-i shisem.

Ghana Football Association (GFA)-ia, mangyim tejashi tulu mapang par kinungertem den asükhü lemsatepogo, ta metetdaksü.

"Pai linük kanga junga tenzükgogo aser Ghana tenüng nungi kodangsa asayadir idangji kanga junga asayaogo," ta GFA tir Kurt Edwin Simeon Okraku-i ashi.

2017 küm pa pound million 14 yong Brighton-i aotsü inyaktep ajisüaka Dwamena-i medical test majangtetba ajanga iba sentong takok mongutet. Pa La Liga nung Levante nungi asayaogo aser Real Zaragoza nunga loan nung oa asayaogo.

2021 küm pa Austria nung Blau-Weiss Linz aser Hartberg na asayaba mapang ground nung laoa liasü saka pa temang tajungba aküm aser maneni asayayonga ao.

Osang ajanga ashiba agi, pa temulungiang operation agi aser automatic defibrillator ka implant süa lir.

"Mangyim jashi mapang nung onoki par kibong bilemteter. Ozü club nung pa legacy tatem maka alitsü," ta Levante-i ashi.

Zaragoza-ia pa nem tetushi agütsüogo aser ashiba agi, "taoba mapang onok nungi asayar Raphael Dwamena asüba tejashitsü osang angazüka onok kanga mepelar. Pa Zaragoza indang fan tem mulung nung teti alitsü. Tesunep nung anisüngzükgang."

West Indies den ODI & T20I asaya atema England team sangdongogo

Yimpoksüi/November 12, 2023 (Agencies): World Cup tembangba sülen West Indies den asayatsü aliba One-Day Internationals (ODIs) aser Twenty20s asayamung atema England aser Wales Cricket Board (ECB)-i asayartem sangdongogo.

England indang 50-over World Cup squad nungi asayar trok maneni team nung züngoksemogo aser team nung tang mezüngbuba Josh Tongue aser John Turner nata ODI aser T20I naprongla atema shimogo.

Jos Buttler lenisüba nung England team asayatsü aser Atkinson, Harry Brook, Brydon Carse, Sam Curran, aser Liam Livingstone nungera maneni World Cup tembangba sülen ODI asayamung nung shilem agitsü shimogo.

ODI asayamung atema

Moeen Ali, Jonny Bairstow, Dawid Malan, Adil Rashid, Joe Root, Ben Stokes, Reece Topley, David Willey, Mark Wood, aser Chris Woakes nunger shima mali.

Ben Stokes, shibai iba ita tetenzüklen pa World Cup tembangba sülen temekok surgery agitsü ta shia liasü, pa iba asayamung nung masayatsü. World Cup nung asayaba asayartem rongnungi David Willey kija nem dang taoba ita central contract magütsü liasü aser pa asaya nungi anenogo.

World Cup nung Pakistan akokba sülen EBC-i, ODI atema asayar 15 aser T20 atema sayar 16 ya sangdonga liasü.

World Cup tetenzüklen England team asaya tenet nungi trok tashi nung tamakok anguba ajanga parnok jenjang mejungi

küma tsükogo, saka parnok tang December 3 nungi 9 tsüngda West Indies den asayatsü aliba ODI dak rangloker lir. ODI asayaba sülen ano December 12 nungi 21 tsüngda T20 pongu asayatsü.

ODI atema England squad: Jos Buttler (captain), Rehan Ahmed, Gus Atkinson, Harry Brook, Brydon Carse, Zak Crawley, Sam Curran, Ben Duckett, Tom Hartley, Will Jaks, Liam Livingstone, Ollie Pope, Phil Salt, Josh Tongue and John Turner.

T20I atema England squad: Jos Buttler (captain), Rehan Ahmed, Moeen Ali, Gus Atkinson, Harry Brook, Sam Curran, Ben Duckett, Will Jaks, Liam Livingstone, Tymal Mills, Adil Rashid, Phil Salt, Josh Tongue, Reece Topley, John Turner and Chris Woakes.

Myanmar nung telungpurtemi fighter...

(Tapak 7 nungi...)

Telungpurtem yagi central Myanmar kübok Sagaing tesem aser Shan State anüolen jilatam maka atstüngogo.

Bendanger mapa inyaktertem tang iba mepetmesü ajanga kongshir lir, kong Vietnam aser Thailand nungertem aika densema lir. Item bendangertem ya timba nisung shibelenertem ajanga akoksadaktsürtem lir ta rights activists temi shiogo.

Thai foreign ministry-i Honibarnü ashiba agi, Thailand nunger 200 tensa agi kodang meladir idangji anintsü atema atatepdar.

KNDF-i parnok indang Facebook page ajanga ashiba

agi, parnoki machine gun tulu amshia Honibarnü military indang jet ya khazüka yokogo aser parnok züngsemtemi pilot tem bushidar.

News outlet Mizzima-i parnok indang Facebook page nung noksa ka lemsatepogo, koba parnoki ashiba agi, pilot ana rongnung ka indang helmet aser parachute lir.

2021 küm February 1 nü military-i Aung San Suu Kyi-i aniba civilian sorkar atsüngtokba sülen linük nung mepetmesü tulu adoka arudar.

Military-i srokar atsüngba sülen parnok anema nüburtemi longkak ait tenzükg aser military-i tashiyim amshia longkak

aitertem azüoktsü merangba mapang tang tashi nung nisung 6,337 tepsetogo aser nisung 2,614 yirutsüogo.

Sorkar atsüngba dang masü saka military-i parnok anemertem anema jenjang tesashia agia Suu Kyi-i anir tongtibang lenirtem aser military anemertem aika tepuokdaki yokogo aser aika nem temerenshi tesashi agütsüogo.

Maneni meimchir temeden anema inyaksangshiba atema alima kintemi Myanmar aser military lenirtem aika nem tenokdangba tesashi agütsüogo aser iba ajanga linük rongsenketzung kanga mejungi lir.

Sweden sorkari 2030 Winter Olympics atema temelaba agütsü

Yimpoksüi/November 12, 2023 (Agencies): Sweden nung 2030 küm Winter Olympics ayongzüka asayatsü atema sorkari Deobarnü teyari agütsütsü telemtetba agiba sangdongogo aser ashiba agi, state guarantees atema inyaksangshi tenzükttsü asoshi renema lir.

"Tanabuba jenjang agia Sweden nung 2030 Winter Games ayongzüka asayatsü atema tenüngdakba state guarantees agütsütsü asoshi conditions tem asadangtsü atema sorkar renema lir," ta sorkari ashi.

Sorkarisa, iba asayamung ayongzüka asayatsü atema application terenem ka benoktsü asoshi Swedish Olympic Committee nem temelaba agütsüogo.

Iba asayamung ya Stockholm aser Falun, Are aser

Ostersund densema central Sweden nung jila balala nung ayongzüka asayatsü.

Asayatem karbo kidanger Latvia aser Norway nunga ayongzüka asayatsü, ta Sweden indang sports minister Jakob Forssmed-i Deobarnü news agency TT dang ashi.

Mongolbarnü France-i, 2030 games atema officially bid asütsü atema sentong tenzükgogo. France nung iba asayamung French Alps temeket nung asayatsü. Kasa mapang nung Switzerland-ia iba asayamung ayongzüka asayatsü tejangraba aliba lemsatepogo.

International Olympic Committee-i parnok telemtetba ka 2024 küm sangdongtsü imlar.

Stockholm nung 1912 küm Summer Games ayongzüka asayaogo saka tang tashi nung Winter Olympics bo khen danga ayongzüka asaya mali.

BILEMDANGANG

"Azümesenertem anema aser kaita alitsü kanga tasak."